

Ionawr 2019



GIG
CYMRU
NHS
WALES

Addysg a Gwella Iechyd
Cymru (AaGIC)
Health Education and
Improvement Wales (HEIW)

**Diweddariad misol yw hwn i bartneriaid a rhanddeiliaid ar ddatblygiad
Addysg a Gwella Iechyd Cymru (AaGIC) gan ei Brif Weithredwr,
Alex Howells.**

**Helpwch ni i ledaenu'r neges am Addysg a Gwella Iechyd Cymru drwy
gylchredeg y bwletinau hyn i'r holl staff.**

Blwyddyn Newydd Dda i Bawb!

Mae'n dri mis ers lansio'r sefydliad ac wrth i'r trefniadau newydd ddechrau bwrw gwreiddiau, rydym yn edrych ymlaen yn fawr at y cyfleoedd sy'n ein haros yn 2019.

Hoffwn ddiolch i'n cydweithwyr yn y sefydliadau partner am eu cyngor a'u harweiniad wrth i ni fynd drwy'r broses pontio; bu hyn yn amhrisiadwy ac o gymorth mawr i hwyluso a chyflymu'r broses.

Bydd 2019 yn flwyddyn allweddol o safbwynt gweithredu *Cymru Iachach*, y cynllun iechyd a gofal cymdeithasol hirdymor, ac mae'r Byrddau Partneriaeth Rhanbarthol ar gamau amrywiol o gyflwyno cynigion ar gyfer cyllid trawsffurfiol i gyflawni ei argymhellion.

Mae AaGIC yn edrych ymlaen at gefnogi partneriaid gyda'r gwaith hwn, yn arbennig i gydnabod y goblygiadau hyfforddi a datblygu'r gweithlu a fydd yn angenrheidiol i gyflawni'r cyfleoedd cyffrous hyn.

Mae'r bwletin hwn yn rhoi blas i chi ar yr hyn a wnaethom yn y chwarter diwethaf a'r hyn sydd ar y gweill yn gynnar yn 2019 i gefnogi'r gwaith hwn a gwaith arall.

Parodrwydd Gweithredol

Er mwyn sicrhau y gallwn gyflawni holl swyddogaethau'r sefydliad newydd, rydym wedi parhau i recriwtio i swyddi gwag a swyddi newydd, ac rydym yn rhagweld y bydd y broses hon wedi'i chwblhau i raddau helaeth erbyn diwedd 18/19.

Yn ogystal, treuliyd amser yn sicrhau bod yr holl staff a drosglwyddwyd i'r sefydliad wedi cael y wybodaeth angenrheidiol i weithredu mewn corff y GIG drwy broses gynefino, a gweithredu systemau, gweithdrefnau a pholisïau newydd.

Diolch i ymroddiad ein staff, a llawer o gefnogaeth allanol, mae'r ffocws ar barhad busnes wedi sicrhau na chododd unrhyw broblemau arwyddocaol er

gwaethaf y broses Rheoliadau Trosglwyddo Ymgymeriadau (Diogelu Cyflogaeth), symud i leoliad newydd, a systemau gwybodaeth a TG newydd.

Cynllun Blynyddol 2019/20

Ers lansio'r sefydliad newydd, rydym wedi gweithredu yn unol â llythyr cylch gwaith Llywodraeth Cymru yn ogystal â'r cynlluniau a'r rhaglenni gwaith y gwnaethom eu hetifeddu oddi wrth y sefydliadau a'n rhagflaenodd.

Mae ein llythyr cylch gwaith ar gyfer 2019/20 yn ei gwneud yn ofynnol i ni gynhyrchu cynllun blynyddol erbyn 2019. Byddwn yn rhannu'r cynllun gyda rhanddeiliaid a phartneriaid i sicrhau dealltwriaeth eang o'n blaenoriaethau cychwynnol.

O 2020/21 ymlaen, bydd yn rhaid i ni ddatblygu Cynllun Tymor Canolig Integredig tair blynedd yn yr un modd â chyrff eraill y GIG, a byddwn yn sicrhau bod cyfle i gynnwys rhanddeiliaid a phartneriaid yng nghamau cynnar y broses honno.

Gofal Sylfaenol

Un o flaenoriaethau 2019/20 fydd datblygu gweithlu i gefnogi'r model gofal sylfaenol newydd.

Rydym yn falch o groesawu Sue Morgan (Cyfarwyddwr Cenedlaethol ac Arweinydd Rhaglen Strategol ar gyfer Gofal Sylfaenol a Chymunedol) a Sian Millar (Cyfarwyddwr y Gwasanaethau Sylfaenol a Chymunedol, Bwrdd Iechyd Aneurin Bevan) i drafod Rhaglen Strategol ar gyfer Gofal Sylfaenol yng nghyfarfod ein Tîm Uwch-reolwyr ym mis Rhagfyr.

Bu'n hynod ddefnyddiol o safbwynt llunio ac integreiddio'r gwaith y mae

angen i ni fwrw ymlaen ag ef, yn arbennig ynghylch datblygu tîm amlddisgyblaethol.

Strategaeth y Gweithlu ar gyfer Iechyd a Gofal Cymdeithasol

Mae *Cymru Iachach* yn ei gwneud yn ofynnol i AaGIC a Gofal Cymdeithasol Cymru gydweithio i ddatblygu strategaeth y gweithlu ar gyfer iechyd a gofal cymdeithasol yng Nghymru erbyn mis Tachwedd 2019.

Sefydlwyd grŵp llywio ar y cyd bach i oruchwyllo'r broses a rhoddwyd contract i'r Sefydliad Gofal Cyhoeddus drwy dendr i gefnogi'r prosiect.

Ein gweledigaeth ar gyfer y strategaeth yw y bydd yn cwmpasu'r system iechyd a gofal cymdeithasol gyfan – nid dim ond y rhan “integredig” – ac yn darparu cyfeiriad a fframwaith clir ar gyfer holl gynlluniau'r gweithlu – mewn perthynas â phroffesiynau, gwasanaethau, sectorau, neu ardaloedd daearyddol.

Tra byddwn yn adeiladu'r strategaeth ar sail yr egwyddorion ac uchelgeisiau a nodir yn *Cymru Iachach*, rydym hefyd yn cynllunio ymarfer ymgysylltu cynhwysfawr dros y misoedd nesaf i'n cynorthwyo i lunio blaenoriaethau'r strategaeth, ac i fanteisio ar y syniadau a'r arbenigedd sy'n bodoli ar draws y system.

Os hoffech gyfrannu at y gwaith fel rhan o'r ymarferion ymgysylltu a/neu ymgynghori, e-bostiwch: HEIW-comms@wales.nhs.uk.

Y cam nesaf fydd cynnal ymgynghoriad ar y cyd â Gofal Cymdeithasol Cymru ynglŷn â'r strategaeth ddrafft yn ddiweddarach yn ystod yr haf.

Comisiynu Addysg ar gyfer 2019/20

Mae'r Gweinidog dros Iechyd a Gwasanaethau Cymdeithasol wedi cytuno ar argymhellion i fuddsoddi £114 miliwn i gefnogi ystod o raglenni addysg a hyfforddiant i weithwyr gofal iechyd proffesiynol yng Nghymru yn 2019/20, sef £7 miliwn yn fwy na 2018/19 a'r pumed cynnydd blynyddol yn olynol.

Defnyddir y cyllid ar gyfer addysg a lleoedd hyfforddi i gefnogi ystod o rolau gan gynnwys:

- Buddsoddiad parhaus i gynnal y nifer o leoedd i israddedigion ar draws yr holl broffesiynau iechyd;
- Buddsoddiad ychwanegol mewn practisau uwch, gweithwyr cymorth gofal iechyd, y proffesiynau fferylliaeth, addysg parafeddygol ac awdioleg;
- Buddsoddiad ychwanegol mewn meddygon ym meysydd meddyginiaeth frys, trawma ac orthopedeg a radioleg, a
- Buddsoddiad pellach yn rôl cymdeithion meddygol, yn cynyddu o 32 i 42 o leoedd.

Dros yr ychydig fisoedd nesaf byddwn yn sefydlu proses newydd ar gyfer datblygu rhifau comisiynu 2020/21 i sicrhau bod gennym y cyngor gwasanaethau a phroffesiynol priodol.

Yn ogystal, byddwn yn cynnal ymarfer tendro ar gyfer adnewyddu ein contractau israddedigion proffesiynol iechyd o 2021/22 ymlaen, a byddwn yn gwahodd rhanddeiliaid a phartneriaid i ddylanwadu ar hyn dros y misoedd nesaf.

E-Adnoddau: Cefnogi Addysg, Datblygiad ac Arferion Gorau

Fel y gwyddoch o bosibl, mae sefydlu AaGIC wedi arwain at fuddsoddiad sylweddol yn e-Lyfrgell Iechyd GIG Cymru i gynnal a gwella mynediad i holl staff y GIG Cymru, deiliaid cytundebau (er enghraifft ymarferwyr cyffredinol,

optometryddion, deintyddion, fferyllwyr cymunedol a gweithwyr cymdeithasol), hyfforddeion, hyfforddwyr a myfyrwyr ar leoliad, i ystod eang o adnoddau ar-lein.

Helpwch ni i barhau i godi ymwybyddiaeth o'r adnoddau gwyh hyn, sy'n cynnwys:

- 2,300+ o e-gyfnodolion;
- 4 offeryn pwynt gofal;
- 18+ o gronfeydd data;
- Canllawiau gan gynnwys *iRefer* a'r *Royal Marsden Manual of Clinical Nursing Procedures*, ac;
- Ystod o adnoddau eraill megis cyhoeddiadau'r Cymdeithasau Brenhinol a sefydliadau, ymchwil, a chanllawiau rhad ac am ddim.

Mae mynediad i'r holl adnoddau yn rhad ac am ddim ac ar gael drwy [fewnrwyd](#) yr e-Lyfrgell drwy ddefnyddio unrhyw ddyfais rwydweithiol y GIG Cymru.

I gael mynediad at e-adnoddau o'ch cartref neu drwy Wi-Fi cyhoeddus, defnyddiwch [fewnrwyd](#) yr e-Lyfrgell.

(Sylwer: i gael mynediad at e-adnoddau o'ch cartref neu drwy Wi-Fi cyhoeddus, mae'n rhaid cael cyfrif Chwiliad Llyfrgell GIG Cymru. Os nad oes gennych gyfrif gallwch gofrestru am gyfrif OpenAthens [yma](#) a chysylltu â'r [Llyfrgell Iechyd yma](#) am gyfrif Chwiliad Llyfrgell GIG Cymru.)

Cymru a'r DU yn Torri Tir Newydd

Mae hyfforddwyr yn rhan allweddol o'n gweithlu estynedig ac un o'n swyddogaethau yw sicrhau ein bod yn eu cefnogi i gyflawni'r gwaith gorau posibl.

Ym mis Rhagfyr, lansiwyd y [Cytundeb Hyfforddwyr Meddygol Cymru Gyfan \(Gofal Eilaidd ac Addysg Israddedig\)](#) mewn partneriaeth ag Ysgol Feddygaeth Prifysgol Caerdydd ac Ysgol Feddygol Prifysgol Abertawe.

Nod y cytundeb yw gwella safonau gofal a diogelwch claf drwy wella amlygrwydd hyfforddwyr meddygol a chydabod eu rolau hollbwysig wrth gefnogi myfyrwyr a hyfforddeion.

Mae'r Cytundeb yn diffinio rôl, cyfrifoldebau a hawliau'r hyfforddwyr meddygol unigol, AaGIC, yr ysgolion meddygol ac ymddiriedolaethau a byrddau iechyd GIG Cymru yn glir, ac yn cyfrannu at well cysondeb a thryloywder yn narpariaeth addysg a hyfforddiant ledled Cymru – ac ar draws gofal israddedigion ac ôl-raddedigion.

Cymru yw'r lle cyntaf yn y DU i fabwysiadu'r dull hwn tuag at hyfforddiant meddygol, ac fe'i gwelir fel cyfraniad pwysig i'r ymgyrch i annog hyfforddeion i Gymru.

Cysylltu â Ni

Os hoffech gysylltu â ni, dyma ein manylion cyswllt:

Addysg a Gwella Iechyd Cymru

Tŷ Dysgu

Cefn Coed

Nantgarw

CF15 7QQ

Ffôn: 03300 585 005

E-bost: heiw@wales.nhs.uk

Edrychwn ymlaen at gydweithio â chi yn 2019.

Dymuniadau gorau,

Alex Howells

Prif Weithredwr



Cymraeg



English



Cymraeg



English

Hawlfraint © AaGIC / GIG Cymru